

est, quàm propter infinitas alias dotes, quas à Deo accepit.

In illa etenim singularis est Soli ubertas, Aëris salubritas, & cæli temperies: ita ut frumento, hordeo, vino, oleo, melle, ficubus, malis granatis, & frugibus omnis generis tum & herbis, floribus, balsamo, tum & pecoribus, volatilibus, piscibus abundantissima; urbibus, castellis, pagis frequentissima, hominum multitudine, (si qua alia in toto orbe) refertissima à Deo ipsomet laudari sæpè meruerit, eamque vocat Terram suam Ezech. 38. y. 16. hæreditatem suam Psal. 73. y. 2. Jerem. 12. y. 7. 8. 9. 14. vineam suam ibid. vers. 10. & Luc. 13. vers. 6. &c.

Dominus Deus (Populo Israëlítico antequam Terram promissam ingrederetur) introducet te in Terram bonam, Terram rivo- rum, aquarumque & fontium: in cujus campis, & montibus erumpunt fluviorum abyssi. Terram frumenti, hordei, & vinearum, in qua ficus, & malogranata, & oliveta nascuntur. Terram olei ac mellis, ubi absque ulla penuria comedes panem tuum, & rerum omnium abundantia perfrueris: cujus lapides ferrum sunt, & de montibus ejus metalla effodiuntur: ut cum comederis, & saturatus fueris, benedicas Domino Deo tuo, pro terra optima, quam dedit tibi. Deuter. 8. vers. 7. 10.

Terra lacte & melle fluens vocatur. Exod. 3. vers. 8. & vers. 17. sic & alibi multoties. Terra, quæ est egregia inter omnes. Ezech.

20. vers. 6. præcipua Terræ omnium ibid. vers. 16.

Et inter exploratores Terræ Chanaan, Josue filius Nun, & Caleb filius Iephone, ad omnem multitudinem filiorum Israël dixerunt. Terra, quam circueimus valde bona est. si propitius fuerit Dominus, introducet nos in eam, & tradet humum lacte & melle manantem, Numer. 14. vers. 6. 7. 8. de iisdem exploratoribus hujus Terræ Moyses: Venerunt usque ad Vallem botri, & consideratâ terrâ fumentes de fructibus ejus, ut ostenderent ubertatem, attulerunt ad nos, atque dixerunt, Bona est Terra, quam Dominus Deus noster daturus est nobis. Deut. 1. vers. 24.

Terra ad quam ingredieris possidendam non est sicut Terra Ægypti, de qua existi, ubi jacto semine in hortorum morem aquæ ducuntur irriguæ: sed montosa est & campestris, de cælo expectans pluvias, quam Dominus Deus tuus invisit, & oculi ejus semper in ea sunt, in principio anni usque ad finem. Deut. 11. vers. 10. 11. 12.

Sed & in ea Patriarcharum, Prophetarum, Iudicum, Regum, Summorum Pontificum apud Hebræos sive Israëlitas, sedes & domus fecit. Sed & Jesus Christus à Prophetis diu promissus in ea homo factus, natus, educatus, & conversatus est, in ea pro nobis lacrymas, & Sanguinem effudit, & mortem passus est. Terraque quæ viventem vidit, mortuum in visceribus triduo continuit, & à morte suscitatum, & triumphantem reddidit, eundemque omnium Iudicem expectat.

